

Date – 17/03/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizoram Lok Sabha inthlan vote thlak ni atan April ni 19 ruat a ni.**
- 2. Chief Minister Pu Lalduhoma'n Bana Kaih-Hand (Holding Policy)-in a tum ber pakhat chu entreprenuer ðha te dap chhuaha ding chhuak tura ðanpui a ni, a ti.**
- 3. Kum 2024 Lok Sabha inthlanpui chu thawh 7-a buatsaih a ni dawn a, June ni 4-ah vote chhiar a ni ang.**
- 4. New Delhi-a AIIMS damdawiinah damlo kal khing hnih a ruala thlak a ni.**

<><><>

MIZORAM LS ELECTION

Mizoram Lok Sabha inthlan vote thlak ni atan April ni 19 ruat a ni a, hemi chungchang hi nimin khan CEO, Madhup Vyas-a'n Aizawlah chanchinbumite a hrilhfiah.

Inthlan hriattirna hi tun thla ni 20-ah tihchhuah a ni ang a, inthlan chuh tumte tan hming pek luh theih hun ni 27 thleng hawn a ni a, ni 28-ah chuh tumte hming endik a ni ang a, ni 30 thleng inhnukdâwk duhte tan hun hawn a. Vote hi ram chhung hmun dang rualin June ni 4-ah chhiar a ni ang.

Mizorama Electoral Roll siam hnukung berah chuan vote nei mi nuai 8 sing 6 sang 1 leh 277 an awm a, mipa Nuai 4 Sing 1 Sang 4 leh 777, hmeichhia Nuai 4 Sing 4 Sang 1 leh 520 bakah Service Elector 4,980 an awm a. Vote nei tamna ber District chu Aizawl a ni a; mi nuai 2 sing 8 sang 8 leh 268 an awm a, vote nei tlemna ber District chu Hnahthial a ni a, vote nei mi 16,257 an awm a ni.

Mizorama Lok Sabha inthlanpui atan venhimna mamawh dan tur ngun taka chhutin State Police mi 3000 chuang bakah Central Armed Police Forces (CAPF) Company 15 vel duty-tir an ni dawn a ni.

Inthlanpuia vote tla a that theihna turin uar taka inzirtirna kalpui a ni a. Lok Sabha inthlan 2019-a vote tla zat zaa 63.13 chu khûm a nih ngei theih nan vote tlak tlem thinna hmunah te, a mi cheng vil zual ngaihna hmunah te

SVEEP hmangin hma lak zel a ni a. Heng hmunah te hian vote thlak an punna turin District Election Officer leh Assistant Returning Officer-te'n ruahmanna siamin hma an la chho mek a ni.

Tun Inthlanpui-ah hian ECIL siam model thar ber M3 – EVM/VVPAT hman a ni dawn a. Election Commission of India chuan inthlannaa hman atana daih zan tur Voter Verifiable Paper Audit Trial (VVPAT) leh Electronic Voting Machine (EVM) a rawn dah tawh a. Khawl endik hna thawh khatna zawh fel tawh niin tunah hian inthlanpui hman tur Ballot Unit 2158, Control Unit 2195 leh VVPAT 2288 te chu District tina Strong Room-ah uluk taka venhimna hnuaiyah dah that tawh a ni.

<><><>

CHIEF ELECTORAL OFFICER

Mizoram Chief Electoral Officer, Madhup Vyas-a chuan Lok Sabha inthlanpui chu thianghlim, fel, zalen, mi tin huap leh telna a nih ngei theih nan Mizoram mipuite tawiawmna a ngen.

Inthlanpui lo awm turah hian State department chuan Mizoram Liquor (Prohibition) Act 2019 chu khauh taka a kenkawh tur thu a sawi a. Polling Station zawng zawngah Commision-in awm tura a tih, Assured Minimum Facilities dah vek a ni ang, a ti bawk.

Hei bakah hian CEO chuan Postal Ballot leh Home Voting Facility chu rualban lo leh upa ten an hman theih turin ruahman a ni bawk ang, a ti.

<><><>

KOLASIB - ELECTIONEERING

Lok Sabha inthlan hun puan a nih hnu nimin khan Kolasib District Election Officer (DEO) Kolasib DC ni bawk Pu John LT Sanga chuan DC Conference Hall-ah Kolasib District chhunga thuthar thehdarhtute a kawm nghal a, DEO chuan Lok Sabha inthlanpui puan anih tak avangin nimin tlai atang khan India ram pumah Model Code of Conduct (MCC) hman nghal ani, a ti.

Pu John LT Sanga chuan Kolasib District chu inthlang turin a inpeih thawkhat tawh thu a sawi a; nikum November thlaa Assembly inthlan dawnah pawh khan Kolasib District chu chanchinbumite thu pawimawh hriat tur hrih tha ber pawl a nih a rin thu a sawi a. Tuna Lok Sabha inthlan pawh hi state assembly inthlan aia a pawimawhna a nep chuang lo a; ram pum huap thlir pheh chuan state inthlan aiin a pawimawh zawk a tih theih a ni, a ti.

Kolasib DEO sawi dan chuan Lok Sabha inthlan hi Chief Election Commissioner-in a puang tawh a, tun kar Nilaini khian Gazette Notification chhuah a ni dawn a ni. Kolasib DEO chuan inthlan puan a nih tawh avangin Model Code of Conduct chu puan nghal a nih thu a sawi a; Kolasib District chhunga Polling Station 89 awm tura Duty turin mi 365 ruahman an nih thu

leh Kolasib District ah hian kumin February thla khan MP inthlan lo awm tura Final Roll tlangzarhin, Vote nei mi 63,802 an awm thu a sawi a ni.

<><><>

CM

Chief Minister Pu Lalduhoma'n Bana Kaih-Hand (Holding Policy)-in a tum ber pakhat chu entrepreneur tha te dap chhuaha ding chhuak tura tanpui a ni, a ti.

Nimina Zuangtui Industrial Estate F. Kapsanga Industry-a darthlalang leh thil dang siamchhuahna a hawwnaah he thu hi sawiin Chief Minister chuan, Entrepreneur tha te an hlu em em a, eng ram pawh hian entrepreneur tha neih tam an duh vek thin a, hei hi a chhan chu Entrepreneur tha zarah ramin Industry-ah te, Service sector lamah te hma a sawn phah thin vang a ni, a ti.

He hunah hian Pu F. Kapsanga fapa, Commerce & Industry Minister, Pu F. Rodinglana pawhin thu sawiin, Industry hi hna zahawm, hlawk leh ram tana tha si a nih avangin hnam dangte pawhin an zah thin hle a ni, a ti a. State dangin Industry neitute an tanpui nasat thin zia a taka a hmuh thin thu sawiin, Mizoram sawrkar pawhin Industry lama than zel a nih theih nan nasa zawka hma lak a tum thu pawh a sawi.

<><><>

W. PHAILENG

Nimin khan W. Phaileng Bazar-ah Project Management Unit leh PHED tangkawpin an buatsaih Faina hnatlang khuh hawn a ni.

He hun hi SDO PHE West Phaileng Pu Lalfakawma'n kaihruiin faina kawngah khawtlang an tanrual thu te, YMA Section tinah Inrinni apianga hnatlang an thawh thin thu leh PHED Department hmalakna chu khawtlangin an tawiawm that thu a sawi.

PHE Ambassador, Pi Laltharzeli chuan hnatlang bul tanin PHED Department chuan District chhung khawtinte'n faina kawnga hma an sawn chu an thupui ber a nih angin hma an la chho mek zel a ni, a ti a. W. Phaileng chu khawfai leh entawn tlak an nih thu leh khaw dang tan pawha entawn tlak ni zel turin a chah a. Khawtlang nu leh pa, tlawmngai pawl hrang hrang te'n naupangin faina kawnga thahnemngaihna chang an hriat nana an kaihruaina chu lawmawm a tih thu sawiin, Mamit District chu Aspirational District a nihna atanga hmasawna hmel hmuh a nih theih nan faina kawngah mitinte'n ke an pen a tul a ni, a ti.

Faina hnatlang khuhhawna-ah hian tlawmngaipawl hrang hrang hruaitu, khawtlang hruaitu, Sanitation Committee hruaitute an tel a ni.

PHED kaihhruaina hnuaiah District chung khaw hrang hrangah faina hnatlangpui hi thawh chhonzawm a ni ang.

<><><>

LOK SABHA POLLS TO BE HELD IN 7 PHASES FROM APRIL 19

Tha thar April ni 19 atangin Lok Sabha inthlan atan vote thlak tan a ni dawn a, vote thlak hi thawh 7-na thleng buatsaih a ni ang. Lok Sabha inthlana vote tlate chu June ni 4-ah chhiar a ni ang.

Kum 2024 Lok Sabha inthlanpui tura hun duante chu nimin khan Election Commission chuan a puang a, state 4-a Assembly inthlan hun tur pawh puan tel a ni.

Vote thlak thawh 1-naah hian Lok Sabha seat 102 atan April ni 19-ah vote thlak a ni dawn a. April ni 26-ah a thawh 2-na atan seat 89-ah vote thlak a ni ang. Vote thlak thawh 3-na chu May ni 7-ah seat 94 atan buatsaih a ni dawn a. May ni 13-ah, seat 96 atan thawh 4-na vote thlak a ni ang a. A thawh 5-na atan Parliament bial 49-ah May ni 20 khian vote thlak a ni ang. Lok Sabha inthlan thawh 6-na atan May ni 25-ah bial 57-ah vote thlak a ni dawn a. Lok Sabha inthlan chhawng tawp berna, a thawh 7-na atan June ni 1-ah Lok Sabha seat 57 dangah vote thlak a ni ang.

Nimina New Delhi-a inthlan hun puangtu Chief Election Commissioner Rajiv Kumar chuan Sikkim, Odisha, Andhra Pradesh leh Arunachal Pradesh-a Assembly inthlan hun ruahmanna a puang bawk a. Sikkim leh Arunachal Pradesh-ah hian April ni 19-ah Lok Sabha MP thlan rualin vote an thlak ang. Andhra Pradesh-ah chuan May ni 13-ah vote thlak a ni ang a. Odisha-ah chuan May ni 13, ni 20 leh June ni 1-ah, Lok Sabha inthlan rualin vote thlak a ni bawk ang.

<><><>

AIIMS NEW DELHI IN COLLABORATION WITH ORGAN RETRIEVAL BANKING ORGANISATION PERFORMS FIRST DUAL KIDNEY TRANSPLANT

All India Institute of Medical Sciences (AIIMS) New Delhi leh Organ Retrieval Banking Organisation tangkawp chuan kal khingnih a ruala thlak hmasak ber AIIMS-ah an buaipui.

Kal thawhtu, kum 78-a upa hmeichhia chu a lu hliam avangin AIIMS Trauma Centre-ah dah a ni a. A thluak a thih tawh thu puan a nih hnu-ah a chhungten a kal chu midang tan an pe ta a ni. Amah hi AIIMS New Delhi-a taksa peng petute zinga upa ber dawttu a ni.

Kal thlak ngai hi hmeichhia tho, kum 51-a upa a ni a, a kal hnathawh khawl hmanga puih ngai a ni tawh a ni. Mi zai hna hi Department of Surgical Disciplines leh Department of Nephrology-ten an thawk a. Damlo hi a kal thlak khing 2-in tha taka hna thawkin a harhchhuak tawh a. Uluk taka thlithlai mek a ni.

<><><>